

## *12. Ko piäiváš já ijjâstáálu lává luámust*

Tiervá!

Tääl lii tälvi.

Mast tom tiätä, ete lii tälvi?  
Tälviv lii miinii hirmâd uccáá, jis ollágin.


Mii tälviv lii uccáá?  
Na, tälviv piäiváš ij päästi jur ollágin tääbbin Säämist.  
Já talle,  
ko mun moonâm Peljituoddârân,  
te piäiváš ij čääiti čuovâčalmegin,  
ij lah oovtágin piäiváásuonjár maanġâ piäiván.


Talle lii tälvi já skammâ já juovlah.  
Juovlâi ääigi piäiváš-uv lii luámust!  
Tast tiätä, ete lii pyeremus tälviäigi.

Ko piäivááčuovâ ij oinuu ollágin,  
te ij kuittâg lah aabâs sevñâd.  
Vielgis muotâloovdâ lii čuovâdub ko muottuuttes eennâm.  
Já almeest láá eres čuovâkäldeeh talle-uv, ko piäiváš ij oinuu.  
Veikâ toh čuovâkäldeeh iä lieggii tego piäiváš,  
mutâ toh adeleh váhá čuovâ.  
Alme máánu páštá jurbâsin  
teikâ segis sirppin  
teikâ peellin vinnood nube teikâ nube suundán.  
Keejâba,  
kuus kulij tot lii vinnood onne? Juovlâi ääigi máánu uáinoo,  
mutâ ij lah laadâs pállu kuittâg.

Te, juovlâi ääigi mun moonâm Peljituoddârân.  
Peljituodâr lii tääbbin Urho Kekkös aalmuglâšmeecist, kost mun-uv aasâm.

Peljituodâr lii ollâ tuodâr,  
mon čohe alne iä šoodâ muorah ollágin,  
mutâ ton vyeliviehtiijn já pirrâ šaddeh ennuv kuosah.  
Peljituodâr lii vaarâ finnim noomâs tast,  
ete ko kiäččá kuhes määđhi keejist, te oro  
ete almeroobdâ vuástá uáinojeh kyehti peelji.





Iä tágáreh uccâ já mučis, tego tuu peeljih láá.  
Iäge tágáreh ijjástáálu peeljih.  
Peic Peljituodâr niävtá, ko kuhes määđhi keejist kiäččá, te pennuu, loddepennuu, ciägupeelji  
peeljijn.

Ko tun keejah hirmâd tárkká,  
te tun huámmášah,  
ete Peljituoddârist láá ohtsis kulmâ peelji ađai čohe.

Peljituoddârân mun moonâm juovlâi ääigi tiädust-uv tondiet,  
ko juovlâäijih áásá tobbeen.  
Nubbe suijâ lii tot,  
ete Peljituoddâr pirrâ šaddeh ennuv kuosah,  
ollâ kuosah, main láá kezis uávsih.  
Te tobbeen láá hirmâd ennuv juovlâkuosah!  
Juovlâijjâ aainâs-uv muu čalmeh uáinih,  
maht jyehi kuosâ kierrui siäivu alme táásnáš.

*Pyereh juovlah já luholáš uđđâ ihe!*

*Elska*

*Paaccáhtiervátásáid čaalij teehi Kristiina Aikio. Jurgálus Tanja Kyrö.*

## **Juovlâpuđâldâs**

Sáárgu kove,

- mast uáinoo Peljituodâr, mon čohe alne iä šoodâ muorah ollágin
- sáárgu tuoddâr pirrâ maanġâid kuosâid, main láá kezis uávsih
- sáárgu jyehi kuosâ kierrui tääsni
- aalman tun puávtáh sárguđ meid máánu

